

## I joegn é jic a troèr la jent de età

*Mingol dant la festes l Zenter Joegn de Soraga ge à sport a si sentadins più veies i ciocolatins e n liber de l'Union di Ladins*



*I joegn e i animatores da Soraga ge à portà fora a la jent de età i ciocolatins compagnè da n bel pensier e l liber sport da l'Union di Ladins de Fascia.*

Una de la scomenzadives de l'Union di Ladins de Fascia che à abù dassen bon ejit l é stat chela de ge sporjer a la jent de età de la val, en ocasion de la festes da Nadèl, n liber che la sociazion à dat fora te chisc egn.

L é stat contatà desvalives gropes che podea dèr na man te la distribuzion. Te vèlch Comun l é stat i assessores a la cultura e al sozièl, te vèlch auter i ge é stac dac fora diretamente te Zircol de la Jent de età.

A Soraga l é stat domanà l aiut del Zenter Joegn tras Carmen Lorenz che sobito à tout su la proponeta con gaissa e la se à endrezà a jir fora te duta la cèses.

La jent de età é stata n muie contenta e i joegn à volù ne manèr chest contribut con i retrac che publicon.

A ic e a duc chi che à sport sia colaborazion, l'Union di Ladins vel ge dir n fort devalpai. MCI

### **Na bela scomenzadiva del Zenter Joegn de Soraga per la jent de età**

No podaane passar via l an 2021, an coscita rie e senester, senza pissar a la jent de età... Ma che far? E co far per ge star mingol vejine e ge dir che ge volon ben?

I animatores del Zenter Joegn i é stac sobito endrezé!

N picol douc, doi righe de recognoscenza e la roba più bela:

portar chest picol pensier de persona, passan de ciasa en ciasa. Dit e fat.

A ognun de nesc 'noni' ge é stat sport 5 bogn ciocolatins e na dedica: «Se auguron che nosc don posse endoucir vosc cher. Bon Nadal! Con afet, i joegn e i animatores del Zenter Joegn».

Ma amò no la é fenida: canche l'Union di Ladins ne à domanà se assane podù far da postins e ge dar fora a duta la jent de età n bel liber

per fascian regalà proprio da l'Union e da Fernando Brunel, ben bolintiera ge aon dit de sci! Coscita douc e cultura à portà na ventada neva e bela.

Sun usc de tante nosce ciase e con le giuste precauzion anti Covid, nesc veies ne à sport n bel grignot e n gran devalpai. Dalbon se pel dir che Soraga l é n paisc picol ma vif!

*L Zenter Joegn de Soraga*